

29 AUG 1999

Matawang-Simposium

PM AKAN BERI CERAMAH MENGENAI KAWALAN MATAWANG

KUALA LUMPUR, 29 Ogos (Bernama) -- Perdana Menteri Datuk Seri Dr Mahathir Mohamad akan menyampaikan ucapan utama pada satu simposium antarabangsa minggu depan mengenai kenapa kawalan mata wang terpilih Malaysia berhasil.

Menurut kenyataan Institut Kajian Strategik dan Antarabangsa (Isis) hari ini berkata simposium sehari itu bagi memperingati ulangtahun pertama keputusan penting Dr Mahathir untuk menguatkuasakan beberapa kawalan matawang terpilih di negara ini.

Simposium mengenai kawalan matawang dan kerjasama kewangan Asia anjuran Isis itu dengan kerjasama Mainichi Newspapers dari Jepun, akan diadakan pada 2 Sept di sebuah hotel terkemuka di sini.

Menurut kenyataan itu pada 1 Sept tahun lepas, Perdana Menteri memutuskan untuk menguatkuasakan kawalan matawang terpilih, satu keputusan yang berani dalam konsep, menakjubkan dari segi pelaksanaannya dan balastik dari segi reaksi yang ditimbulkannya.

Bagi keputusan itu, ia berkata Dr Mahathir dan Malaysia benar-benar dikecam dalam media antarabangsa dan kecaman itu berterusan selama hampir setahun.

Menurut kenyataan itu hanya baru-baru ini pendapat mengenai kawalan matawang telah berubah dan terdapat kesediaan yang lebih besar untuk mengakui bahawa kawalan matawang mempunyai sedikit merit dan mungkin dasar yang berdaya maju dalam situasi krisis.

Menurutnya keputusan bersejarah Dr Mahathir telah membuatkan Jepun dan beberapa negara Asean menyedari bahawa tidak hanya satu sahaja organisasi, mempunyai monopoli tindak balas sesuai terhadap situasi krisis.

Perkara itu, sebaliknya, menurut kenyataan itu telah membawa kepada penyelidikan yang lebih gigih terhadap maklum balas berorientasikan Asia mengenai krisis masa akan datang.

Penasihat Khas Menteri Kewangan Jepun Dr Eisuke Sakakibara atau lebih dikenali sebagai "Mr Yen" juga akan menyampaikan ucapan utama bertajuk "Cabaran Baru Kapitalisme Siber".

Timbalan Perdana Menteri Thailand Dr Supachai Panitchpakdi yang juga Ketua Pengarah Pertubuhan Perdagangan Dunia (WTO) merupakan seorang lagi penyampai ucapan utama akan bercakap mengenai "Pengurusan Krisis Kewangan: Penyelidikan Rangka Kerja Berdaya Maju".

Perbincangan panel akan dipengerusikan oleh Pengerusi dan Ketua Pegawai Eksekutif Isis Tan Sri Dr Noordin Sopiee dan beberapa penceramah terkemuka akan mengambil bahagian termasuk Penasihat Kanan Bank Dunia Dr Amar Bhattacharya, Pengerusi Pertubuhan Dagangan Luar Jepun (Jetro) Noboru Hatakeyama dan Penasihat Menteri Perdagangan Thailand Dr Sura Sanittanont.

Individu atau organisasi yang berminat menyertai simposium itu boleh menghubungi Meilina Puteh di talian 03-2939366.

-- BERNAMA

NZ RHM RON